

मु॒द्रं का॒मम॒भ्यज॑यन् । स॒मु॒द्रं ह॒ वै का॒मम॒भिज॑-  
यति । य ए॒तेन॑ ह॒विषा॑ यज॑ते । यउ॑चैनदे॒वं वेद॑ । सो  
ऽच॑ जुहोति । अ॒द्भ्यः स्वा॒हाऽषा॒ढाभ्यः॑ स्वा॒हा । स॒मु-  
द्राय॑ स्वा॒हा का॒माय॑ स्वा॒हा । अ॒भिजि॑त्यै स्वा॒हेति॑  
॥ ४ ॥

विश्वे॒ वै दे॒वा अ॒काम॑यन्त । अ॒न॒प॒ज॒य्यं ज॑येमेति । त-  
ए॒तं विश्वे॑भ्यो दे॒वेभ्यो॑ऽषा॒ढाभ्यश्च॑रुं निर॑वपन् । ततो॒ वै  
तेऽन॑प॒ज॒य्यम॑जयन् । अ॒न॒प॒ज॒य्यं ह॒ वै ज॑यति । य ए॒तेन॑  
ह॒विषा॑ यज॑ते । यउ॑चैनदे॒वं वेद॑ । सोऽच॑ जुहोति । वि-  
श्वे॑भ्यो दे॒वेभ्यः॑ स्वा॒हाऽषा॒ढाभ्यः॑ स्वा॒हा । अ॒न॒प॒ज॒य्याय॑  
स्वा॒हाभिजि॑त्यै स्वा॒हेति॑ ॥ ५ ॥

ब्र॒ह्म वा अ॒काम॑यत । ब्र॒ह्म॒लो॒कम॒भिज॑येयमिति ।  
तदे॒तं ब्र॒ह्म॒णोऽभि॑जिते च॒रुं निर॑वपत् । ततो॒ वै तद्ब्र॒ह्म-  
लो॒कम॒भ्यज॑यत् । ब्र॒ह्म॒लो॒कं ह॒ वा अ॒भिज॑यति । य ए॒-  
तेन॑ ह॒विषा॑ यज॑ते । यउ॑चैनदे॒वं वेद॑ । सोऽच॑ जुहोति ।  
ब्र॒ह्म॒णे स्वा॒हाभिजि॑ते स्वा॒हा । ब्र॒ह्म॒लो॒काय॑ स्वा॒हाऽ-  
भिजि॑त्यै स्वा॒हेति॑ ॥ ६ ॥

विष्णु॑र्वा अ॒काम॑यत । पु॒ण्यं श्लो॒कं शृ॒ण्वीया॑ न मा  
पा॒पी की॒र्त्तिराग॑च्छेदिति । स ए॒तं विष्णु॑वे श्रो॒णायै॑ पु-